

艺术典

藝術典第六十一卷

醫部彙考四十一

黃帝素問四十一 刺法論篇第七十二

舊本云此與本病論俱亡今素問遺篇存此二篇

本病論篇第七十三

俱補附後

至真要大論篇第七十四

上

馬蒔曰此篇總括前八篇未盡之義至真至要故名篇

張志聰曰此篇論六氣司天六氣在

泉有正化有勝復有主客有邪勝至真者謂司天在泉之精氣乃天一之真元要者謂司歲備物以平治其民病無傷天地之至真乃養生之至要也

黃帝問曰五氣交合盈虛更作余知之矣六氣分治司天地者其至何如岐伯再拜對曰明乎哉問也天地之大紀人神之通應也帝曰願聞上合昭昭下合冥冥奈何岐伯曰此道之所生工之所疑也帝曰願聞其道也岐伯曰厥陰司天其化以風少陰司天其化以熱太陰司天其化以濕少陽司天其化以火陽明司天其化以燥太陽司天其化以寒以所臨臟位命其病者也帝曰地化奈何岐伯曰司天同候間氣皆然帝曰間氣何謂岐伯曰司天左右者是謂間氣也帝曰何以異之岐伯曰主



歲者紀歲間氣者紀步也

更平聲

王冰曰五行主歲歲有少多故曰盈虛更作也天分六氣散生大

虛三之氣司天終之氣監地天地生化是爲大紀故言司天地者餘四可知矣夫天地變化人神運爲中外難殊然其通應則一也工之所疑謂不知其要流散無窮也其化以風謂飛揚鼓圻和氣發生萬物榮枯皆因而化變成敗也其化以熱謂炎蒸鬱燠故庶類蕃茂也其化以濕謂雲雨潤澤津液生成也其化以火謂炎熾赫烈以燥寒災也其化以燥謂乾化以行物無濕敗也其化以寒者對陽之化也司天同候間氣皆然謂六氣之本自有常性故雖位易而化治皆同間氣者六氣分化常以二氣司天地爲上下吉凶勝復客主之事歲中悔吝從而明之餘四氣散居左右也主歲紀歲間氣紀步者歲三百六十五日四分日之一步六十日餘八十七刻半若積步之日而成歲也 馬蒔曰此明司天在泉間氣之化隨六氣所在而移之也五運分爲五氣以太過不及而有盈有虛也天元紀大論曰其始也有餘而往不足隨之不足而往有餘從之正盈虛更作之義也六氣者風熱濕火燥寒也卽其分治以司天地餘四氣可知矣化有不同帝之所以問也上合昭昭者司天之化也下合冥冥者在泉之化也然厥陰司天其化以風而爲在泉之地化

猶是也爲左右之間氣亦猶是也少陰司天其化以熱而爲在泉之地化猶是也爲左右之間氣亦猶是也太陰司天其化以濕而爲在泉之地化猶是也爲左右之間氣亦猶是也少陽司天其化以火而爲在泉之地化猶是也爲左右之間氣亦猶是也陽明司天其化以燥而爲在泉之地化猶是也爲左右之間氣亦猶是也太陽司天其化以寒而爲在泉之地化猶是也爲左右之間氣亦猶是也但司天之氣以所臨之臟位而命其病如肝木位東方心火位南方脾土位中央及四維肺金位西方腎水位北方是乃五臟定位惟六氣御五運所至氣不相得則病相得則和故先以六氣所臨後言五臟之病也至於在泉與左右間亦不過如是而已故以各氣而在左右者謂之間氣間氣者正所以紀步步者六十日餘八十七刻半也積步而成歲則六六三百六十五日有奇矣其每歲司天主歲正所以紀歲氣而左右間氣又與六步而相紀也

張志聰曰昭

昭合天道之明顯冥冥合在泉之幽深道之所生其生惟一工不知其要則流散無窮故多疑也夫風寒暑濕燥火天之六氣也三陰三陽上奉之故六氣爲司天之化臨臟位者天氣上臨而下合人之臟位隨六氣之所傷而命其病也然六氣司天而環遶於地下故與司天同候從左右而

環轉是以間氣皆然但司天在泉之氣紀歲間氣紀步之不同也

帝曰善歲主奈何岐伯曰厥陰司天爲風化在泉爲酸化司氣爲蒼化間氣爲動化少陰司天爲熱化在泉爲苦化不司氣化居氣爲灼化太陰司天爲濕化在泉爲甘化司氣爲斡化間氣爲柔化少陽司天爲火化在泉爲苦化司氣爲丹化間氣爲明化陽明司天爲燥化在泉爲辛化司氣爲素化間氣爲清化太陽司天爲寒化在泉爲鹹化司氣爲元化間氣爲藏化故治病者必明六化分治五味五色所生五臟所宜迺可以言盈虛病生之緒也 馬蒔曰此承上文而言六化正明六氣分治及主歲者紀歲之大義也已亥之歲厥陰司天而爲風化風高氣遠雲物飛揚也若寅申之歲則在泉而爲酸化蓋木司地氣物化乃從酸也丁壬之歲則司木運之氣而爲蒼化至於丑未之歲則爲在泉之左間主初之氣子午之歲則爲司天之右間主二之氣辰戌之歲則爲司天之左間主四之氣卯酉之歲則爲在泉之右間主五之氣而皆爲動化偏生左右處爲動搖也此皆各主六十日餘八十七刻半耳後倣此子午之歲少陰司天而爲熱化陽火燿燿炎暑流行也若卯酉之歲則在泉而爲苦化火司地氣物以苦生也然各氣主運惟君火不主運故不司氣化天元紀



大論云君火以名相火以位正以明君火不主運也至於居左右之氣則君火無所不居不得以間氣名之寅申之歲則居在泉之左主初之氣丑未之歲則居司天之右主二之氣巳亥之歲則居司天之左主四之氣辰戌之歲則居在泉之右主五之氣而爲灼化也故左間右間間氣之間皆宜讀曰平聲明有旁居之義也君爲至尊不敢曰間而曰居耳丑未之歲太陰司天而爲濕化埃鬱瞤昧雲雨潤濕也若辰戌之歲則在泉而爲甘化土司地氣甘化先焉甲己之歲則司土運之氣而爲齡化至於卯酉之歲則爲在泉之左間主初之氣寅申之歲則爲司天之右間主五之氣而爲柔化濕化氣子午之歲則爲司天之左間主四之氣巳亥之歲則爲在泉之右間主五之氣而爲柔化濕化流行則庶物柔爽也寅申之歲少陽司天而爲火化炎光赫烈燔灼焦然也若巳亥之歲則在泉而爲苦化火司地氣苦化先焉戊癸之歲則司火運之氣而爲丹化至於辰戌之歲則爲在泉之左間主初之氣卯酉之歲則爲司天之右間主二之氣丑未之歲則爲司天之左間主四之氣子午之歲則爲在泉之右間主五之氣而皆爲明化炳明霞燒草木榮美也卯酉之歲陽明司天而爲燥化清涼勁切霧露蕭飈也若子午之歲則在泉而爲辛化金司地氣辛化先焉乙庚之歲則

司金運之氣而爲素化至於巳亥之歲則爲在泉之左間主初之氣辰戌之歲則爲司天之右間主二之氣寅申之歲則爲司天之左間主四之氣丑未之歲則爲在泉之右間主五之氣而皆爲清化風生高勁草木清冷也辰戌之歲太陽司天而爲寒化嚴肅峻整慘慄凝堅也若丑未之歲則在泉而爲鹹化水司地氣物化從鹹也丙辛之歲則司水運之氣而爲元化至於子午之歲則爲在泉之左間主初之氣巳亥之歲則爲司天之右間主二之氣卯酉之歲則爲司天之左間主四之氣寅申之歲則爲在泉之右間主五之氣而皆爲藏化陰凝寒冷庶物歸藏也故凡治病者必明司天之六化在泉之五味司運之五色間氣之動灼柔明藏乃五臟所宜則可以言每歲盈虛病生之緒而上文盈虛更作之間主歲者紀歲之義明矣

張志聰曰主歲者謂六氣之各

主一歲風寒暑濕燥火乃在天之六氣故爲司天之化天元紀論曰在地爲化化生五味故在地爲味化司氣者司五運之氣化五運者五行之氣也感天之蒼齡丹素元之五色而化生地之五行是以司氣爲蒼爲丹爲齡爲素君火以明而在天故不司在地之火化所謂居氣者言少陰不司氣化在六氣之中自有所居之上下卽下章之南政居南北政居北也間氣之爲動爲灼爲柔

爲明爲清爲藏者六氣之用也此論六氣之司天在泉及化運間氣之分治皆有盛有虛而爲民病治病者或從歲氣或隨運氣以備物以所生之五味五色合五臟之所宜乃可以言五運六化之盈虛病生之端緒也

帝曰厥陰在泉而酸化先余知之矣風化之行也何如岐伯曰風行於地所謂本也餘氣同法本乎天者天之氣也本乎地者地之氣也天地合氣六節分而萬物化生矣故曰謹候氣宜無失病機此之謂也王冰曰厥陰在泉風行於地少陰在泉熱行於地太陰在泉濕行於地少陽在泉火行於

地陽明在泉燥行於地太陽在泉寒行於地故曰餘氣同法也本謂六氣之上元氣也化於天者爲天氣化於地者爲地氣萬物居天地之間悉爲六氣所生化陰陽之用未嘗有逃生化出陰陽者馬蒔曰此帝問厥陰在泉之爲風化而伯以其本於地氣者告之也首節言厥陰司天其

化以風而又論地化曰司天同候則地化亦以風也茲言在泉爲酸化者可得而知而在泉爲風化其義似有所悖殊不知司天則風行於天在泉則風行於地乃本於地之氣而爲風之化也若時乎司天則本乎天之氣而亦爲風化矣至各氣司天則亦本乎天氣而爲天化矣故曰餘氣同



法也惟此天地合氣六節各分而萬物所由以化生故本乎天而化者由於司天之氣本乎地而化者由於司地之氣此在天地爲氣宜而在人身爲病機必謹候之而可以治病矣 張志聰

曰此言司天在泉俱以六氣爲本六氣隨地環轉而上下周行又非氣司天化而味主地化也六氣之本於上者卽爲天之氣本乎下者卽爲地之氣天地合氣六節分而萬物化生故謹候六氣之所宜無失五行之病機斯得至真之要道

帝曰其主病何如岐伯曰司歲備物則無遺主矣帝曰先歲物何也岐伯曰天地之專精也帝曰司氣者何如岐伯曰司氣者主歲同然有餘不足也帝曰非司歲物何謂也岐伯曰散也故質同而異等也氣味有薄厚性用有躁靜治保有多少力化有淺深此之謂也 王冰曰主病言采藥之歲也謹候司天地所生化者則其味正當其歲也故彼藥工專司歲氣所收藥物則一歲二歲其所主用無遺略也專精之氣藥物肥濃又於使用當其正氣味也五運主歲者有餘不足比之歲物恐有薄有餘之歲藥專精也非司歲物言非專精則散氣散氣則物不純也形質雖同力用則異故不尙之氣味薄厚性用躁靜治保多少力化淺深此物與歲不同耳 馬蒔曰此言藥備歲物

者爲天地之專精而司歲者其氣偏非歲物者其氣散也上文言候氣宜而無失病機則用藥以治病不可無所主也伯言每歲各有所司必因其司歲者以備藥物則病無遺主矣正以每歲之司天在泉物從其化而天地之專精儲焉故不可不先之也彼司氣者卽司運也如甲己爲土運乙庚爲金運然太過則有餘不及則不足其氣偏耳若非歲物而用之則其氣又散故一物之質同而有專精完全偏散之異所以氣味有厚薄性用有躁靜治保有多少力化有淺深此歲物之不可以不備也

張志聰曰主病謂主治病之藥物司歲備物謂從六氣五運以備之如少陰少陽二火司歲則收附子薑桂之熱物如陽明燥金司歲則收桑皮蒼朮之燥物如厥陰風氣主歲則收防風羌活之風物如太陽寒水司歲則收芩連大黃之寒物如太陰土氣司歲則收山藥黃精之類甘平甘溫之品以及蒼丹齡素元之穀所謂藥食宜也此皆得天地之專精故先取歲物謂先備司歲之物卽上章之所謂食歲穀以全其真蓋食天地之精以養吾身之真也司氣謂五運之氣五運雖與主歲相同然又有太過不及之分太過之歲則物力厚不及之歲則物力淺薄矣若非氣運司歲之物則氣散而力薄故形質雖同而氣味有淺深厚薄之異治保有多少者

謂治病保真之藥食或宜多用或宜少用也按中古之世不能司歲備物用炮製以代天地之助如製附子曰炮製蒼朮桑皮曰炒蓋以火助火而以燥助燥也近有製附子以水煮曰陰製製桑皮以蜜拌曰潤燥是猶用鷹犬而去其爪牙則驅之搏蹇兔而不能又安望韓盧之技哉

帝曰歲主臟害何謂岐伯曰以所不勝命之則其要也帝曰治之奈何岐伯曰上淫於下所勝平之外淫於內所勝治之 王冰曰不勝謂木不勝金金不勝火之類淫謂行所不勝己者上淫於天下之氣也外淫於內地之氣也隨所制勝而以平治之也制勝謂五味寒熱溫涼隨勝用之 馬

蒔曰此言歲之五臟被害者以其有所不勝而治之有法也歲氣在天五臟在人而歲主五臟有害者正以木氣淫則脾不勝火氣淫則肺不勝土氣淫則腎不勝金氣淫則肝不勝水氣淫則心不勝以所不勝命之則知害臟之要也故司天之氣淫於下而臟病生則以所勝者平之如木氣淫則以金制之者是也至在泉之氣淫於內而臟病生則亦以所勝者治之即木氣淫而以金制之者是也所謂制勝者謂五味寒熱溫涼隨勝而用之耳但上淫於下者淫於三氣已前有勝無復也外淫於內者淫於四歲以後有勝無復也 張志聰曰此論五運之氣受司天在泉之勝



制歲主者謂六氣之主歲臟五臟也蓋言五臟內屬五行而外合五運五運之氣受勝制之所傷則病人五臟而爲害矣如少商金運而值二火司天少宮土運而值厥陰在泉此皆運氣之所不勝而受勝氣之所勝制故以所不勝命之則歲主臟害之要可知矣上淫於下者謂司天之氣淫勝其在下之運氣當以所勝平之如少商金運而火熱上臨宜平以鹹寒佐以苦甘外淫於內者在泉之氣淫勝其在內之五運當以所勝治之如少宮土運而風木下淫宜治以辛涼佐以苦甘按司天在泉之氣根於外五運之化根於中故曰外淫於內下章平天氣曰平治在泉曰治又諸氣在泉曰淫於內

帝曰善平氣何如岐伯曰謹察陰陽所在而調之以平爲期正者正治反者反治 王冰曰平謂診平和之氣知陰陽所在則知尺寸應與不應不知陰陽所在則以得爲失以逆爲從故謹察之也諸方之制咸悉不然故曰反者反治也 馬蒔曰此言歲氣之平而有所病者亦視其正反而

善治之也上文言上淫於下外淫於內而爲病皆以歲氣不平也故有平氣而民病者何也伯言陰陽者尺寸之位與夫陰脈陽脈陰經陽經皆曰陰陽也當謹察而調之以平爲期如陰經病而

陽經不病陽經病而陰經不病是爲正病也正則以寒藥治熱以熱藥治寒從而正治之耳若陰位而見陽脉陽位而見陰脉是爲反病也反則以寒藥治寒以熱藥治熱從而反治之耳 張

志聰曰平氣謂無上下之勝制運氣之和平也甲丙戊庚壬爲陽運乙丁己辛癸爲陰運陰陽二運有太過不及之分故謹察陰陽所在而調之以平爲期正者正治謂太過之歲當抑其勝氣扶其不勝反者反治謂不及之運爲所不勝之氣反勝當反佐以取之

帝曰夫子言察陰陽所在而調之論言人迎與寸口相應若引繩小大齊等命曰平陰之所在寸口何如岐伯曰視歲南北可知之矣帝曰願卒聞之岐伯曰北政之歲少陰在泉則寸口不應厥陰在泉則右不應太陰在泉則左不應南政之歲少陰司天則寸口不應厥陰司天則右不應太陰司天則左不應諸不應者反其診則見矣帝曰尺候何如岐伯曰北政之歲三陰在下則寸不應三陰在上則尺不應南政之歲三陰在天則寸不應三陰在泉則尺不應左右同故曰知其要者一言而終不知其要流散無窮此之謂也 王冰曰陰之所在脉沈不應引繩齊等其候頗乖故問之北政木火金水運面北受氣凡氣在泉者脉悉不見唯左右之氣脉可見之在泉之氣善則不見惡者可

見病以氣及客主淫勝名之在天之氣亦然厥陰在泉則少陰在右故右不應太陰在泉則少陰在左故左不應南政土運之歲面南行令故少陰司天則兩手寸口不應不應皆爲脈沈仰手而沈覆其手則沈爲浮細爲大也司天曰上在泉曰下天不應寸左右悉與寸不應義同要謂知陰陽所在知則用之不惑不知則尺寸之氣沈微小大常三歲一差也 馬蒔曰此言南北二政

之司天在泉其尺寸之脈各有所不應也靈樞禁服篇云寸口中主人迎主外兩者相應俱往俱來若引繩大小齊等春夏人迎微大秋冬寸口微大如是者名曰平人夫曰微大則脈之和者也今寸口之脈而有陰脈來現沈而不應則與大小齊等微大之義拂矣伯言自左右手而言之則左寸爲人迎而右寸爲寸口自兩手而言則兩手之寸皆爲寸而兩手之尺皆爲尺故寸口之脈有時不宜應者視歲有南北之政可知之矣蓋五運以甲己土運爲尊六氣以少陰君火爲尊故以甲己土運爲南政乃面南而行令與君主司其餘四運爲北政則面北而受令與臣子同惟以少陰爲君主凡脈之司天在泉不應者皆以少陰而論之故北政之歲人氣面北而寸北尺南地左間之氣在右寸右間之氣在左寸天左間之氣在右尺右間之氣在左尺故乙卯乙酉丁卯丁



酉辛卯辛酉癸卯癸酉乃少陰在泉也則兩寸之脈俱不應夫南政爲少陰司天則兩寸不應今北政少陰在泉而亦兩寸不應者從君而不從臣也故不以尺爲主而以寸爲主耳訣云子午南少北卯酉兩手沈寸口者是也北政之歲丙寅丙申戊寅戊申庚寅庚申壬寅壬申乃厥陰在泉其左間則少陰而右間則太陽也宜右寸之脈不應夫南政厥陰司天則左間少陰故右寸之脈不應今北政厥陰在泉而亦右寸之脈不應者亦從君而不從臣也故不以尺爲主而以寸爲主耳訣云巳亥南厥北寅申右寸脈潛形者是也北政之歲丙辰丙戌戊辰戊戌庚辰庚戌壬辰壬戌乃太陰在泉其左間則少陽而右間則少陰也宜右寸之脈不應夫南政太陰司天則左寸不應今北政太陰在泉而亦左寸不應者從君而不從臣也訣云丑未南太北辰戌左手寸不出者是也若使北政三陰司天而不在泉則其不應者不在寸而在尺矣故下文曰北政之歲三陰在下則寸不應若三陰在上則尺不應者此也南政之歲如甲子甲午乃少陰司天則兩寸之脈俱不應如前所云者是也南政之歲如己巳己亥乃厥陰司天其左間則少陰而右間則太陽宜右寸之脈不應如前所云者是也南政之歲如己丑己未乃太陰司天其左間則少陽而右間則少

陰宜左寸之脈不應如前所云者是也若使南政三陰在泉而不司天則其不應者不在寸而在尺矣故下文曰南政之歲三陰在天則寸不應若三陰在泉則尺不應者此也所謂諸不應者卽南北二政而相反以診之則南政主在寸者北政主在尺而南政主在尺者北政主在寸則其脈自明矣且不惟尺寸爲然凡南北之左右二間其相反與尺寸同耳此乃要之所在而不可不知者也

張志聰曰此承上文以申明少陰之所在也五運之中少陰不司氣化隨六氣之陰陽而上下左右故曰陰之所在何如聖人南面而立前曰廣明後曰太衝太衝之地名曰少陰少陰之上名曰太陽蓋太衝坎位也廣明離位也少陰主天一之坎水而上爲太陽之離火是以北政之歲隨三陰而在坎南政之歲從三陽而在離故有應不應之分焉所謂南北者陰陽也五運之中戊癸化火以戊癸年爲南政甲乙丙丁己庚辛壬爲北政五運之政有南有北少陰之氣有陰有陽是以隨之而上下也寸尺血脈也血乃中焦之汁流溢於下而爲精奉心神化赤而爲血故脈始於足少陰腎而主於手少陰心是以診寸尺之陰陽以徵少陰之上下若風寒暑濕燥火天之陰陽也三陰三陽上奉之以司主歲之六氣木火土金水火地之陰陽也以司五行之化運化

運五歲而右遷而五行之中有二火故君火不司氣化然雖不主運而有所居之位焉少陰之上君火主之是少陰本於陰而主於陽是以南政之歲居於陽北政之歲居於陰也司天在南在泉在北此天地之定位人面南而診之寸爲陽而在南尺爲陰而在北北政之歲少陰在泉則隨陰而居北是以寸口不應南政之歲少陰司天則對陰而居陽是以寸口不應不應者脈微而不應於診此論寸尺之陰陽南北也北政之歲厥陰在泉則少陰在左故右不應太陰在泉則少陰在右故左不應南政之歲厥陰司天則少陰在左故右不應太陰司天則少陰在右故左不應此論人迎寸口之左右也諸不應者爲左右之不應也反其診者以人面南面北而診之也蓋以圖象平置於几上以司天在南在泉在北北政之歲人面北以診之南政之歲人面南以診之則左右之不應可見矣夫天上地下天南地北此天地之定位也人面南而面北者人居天地氣交之中隨天地之氣而環轉也所謂三陰者以少陰居二陰之中上下者以天在上而泉在下也左右同者謂尺之左右不應與寸之左右不應同也故知其要者知少陰之不司氣化隨陰陽而居上居下也不知其要流散無窮者如疏註之議論紛紜而茫無歸著也 朱衛公問曰假如甲子甲午